

AMALAN INFAQ DALAM KALANGAN KAKITANGAN KOLEJ UNIVERSITI ISLAM ANTARABANGSA SELANGOR: TABUNG INFAQ, SATU ANALISIS AWAL.

Norhanizah Johari (norhanizah@kuis.edu.my)

Abstrak

Infaq dalam bahasa arab bermaksud ‘belanja’ manakala secara konseptualnya ia bermaksud memberi untuk kebaikan masyarakat termasuk kepada si pemberi infaq dan keluarganya (Kahf, 2008). Secara umumnya Infaq bermaksud membelanjakan harta pada jalan Allah SWT manakala secara khususnya, infaq adalah memberikan harta benda yang bermanfaat kepada orang lain. Islam menuntut umatnya memanfaatkan harta ke arah kebaikan. Seseorang Muslim itu perlu akur kurniaan rezeki adalah dari Ilahi dan Dia adalah Pemilik Mutlak kepada segalanya bahawa. Infaq memerlukan persediaan akal fikiran yang bukan sedikit dan amalan infaq juga tidak dapat dibudayakan tanpa pemerksaan nilai-nilai takwa dalam diri seseorang Muslim. Oleh yang demikian, amalan infaq itu sekaligus merupakan persediaan budaya, minda dan rohaniah. Bertitik tolak dari inilah maka penyelidik berhasrat mengkaji amalan infaq dalam kalangan kakitangan di Kolej Universiti Islam Antarabangsa Selangor (KUIS), khususnya bagi tabung infaq KUIS yang telah diwujudkan semenjak 2002 lagi. Penyelidik menggunakan data sekunder dari Penyata Tabung Infaq KUIS 2013 dan menjalankan analisis frekuensi untuk mencapai objektif kajian. Di dapati peratusan kakitangan yang menyumbang ke dalam Tabung Infaq KUIS ini adalah agak rendah iaitu 13.81% atau bersamaan dengan purata 84 orang peserta daripada 607 orang kakitangan dengan purata amaun potongan RM17.80 setiap peserta. Anjakan gaji pada bulan Julai 2013, tidak menunjukkan kesan peningkatan yang ketara terhadap bilangan peserta dan amaun Tabung Infaq ini bagi tempoh yang dikaji. Walaubagaimanapun sumbangan peserta-peserta ini sangat besar dalam usaha menampung kos perbelanjaan Masjid Al Azhar yang semakin meningkat saban tahun. Semoga dapatan kajian ini dapat membantu meningkatkan lagi bilangan peserta dan amaun infaq pada masa hadapan.

Kata kunci: *Infaq, sedekah, pengurusan masjid.*

Pengenalan

Kolej Universiti Islam Antarabangsa Selangor (KUIS) atau terdahulu dinamakan KISDAR (Kolej Islam Darul Ehsan) merupakan sebuah Institusi Pengajian Tinggi Islam milik sepenuhnya Majlis Agama Islam Selangor (MAIS) yang ditubuhkan di bawah akta IPTS 1996. Penubuhannya secara rasmi pada 15 Februari 1995 membuktikan komitmen kerajaan negeri dalam membangunkan agenda pendidikan dan kecemerlangan ilmu. KUIS juga berperanan menyediakan alternatif bagi lepasan sekolah untuk melanjutkan pengajian ke peringkat yang lebih tinggi.

Sehingga kini, KUIS masih mengekalkan objektif awal penubuhannya untuk melahirkan lebih ramai tenaga profesional Islam yang mampu memimpin masyarakat serta membangun dan mengembangkan ilmu pengetahuan Islam. Sejajar dengan itu juga, KUIS bertekad untuk menjadi sebuah gedung ilmu bertaraf antarabangsa dan pelopor dalam kalangan institusi

pendidikan tinggi swasta berteraskan Islam dengan hasrat melahirkan modal insan sebagai dai'e, ulama' dan umara'.

Tabung Infaq

Tabung ini mula diwujudkan kepada kakitangan KISDAR sejak September 2002. Menurut Bahagian Pengurusan Insan (2014), Tabung Infaq diwujudkan bertujuan untuk membantu menampung keperluan kos pengurusan Masjid Al Azhar, KUIS yang semakin meningkat saban tahun. Pada awal kewujudan tabung ini jumlah potongan pada bulan pertama ialah sebanyak RM160.00 dengan bilangan peserta seramai 14 orang. Jumlah ini kemudiannya meningkat sehingga ke RM1,288 pada Disember 2013 seiring dengan pertambahan bilangan peserta kepada 81 orang (Bahagian Pengurusan Insan, 2014). Bagaimanapun peningkatan bilangan peserta dilihat tidak seiring dengan peningkatan amaun potongan infaq ini.

Tahun 2013 dijadikan kayu pengukur bagi kajian ini kerana pada tahun ini berlaku anjakan gaji kakitangan di bawah pengurusan baharu KUIS di bawah pimpinan Rektor KUIS iaitu Prof. Dato' Dr. Abdul Halim Tamuri. Anjakan gaji ini dilakukan pada bulan Julai 2013 selepas beberapa tahun tiada anjakan gaji asbab bebanan kewangan yang dihadapi oleh pihak KUIS. Oleh itu pengkaji berhasrat mengenalpasti:

1. berapakah peratusan peserta yang membuat potongan bagi tabung infaq KUIS untuk tujuh bulan pertama 2013 dan bulan-bulan berikutnya?
2. berapakah amaun tabung infaq ini untuk tujuh bulan pertama 2013 dan bulan-bulan berikutnya?
3. adakah berlaku peningkatan amaun potongan bagi Tabung Infaq apabila berlaku anjakan gaji selepas bulan Julai 2013?

Untuk tujuan ini, pengkaji menggunakan maklumat dari penyata potongan Tabung Infaq KUIS 2013 (Bahagian Pengurusan Insan, 2014) untuk mencapai objektif yang telah dinyatakan. Di harap kajian ini mampu mempertingkatkan semangat berinfaq kepada setiap kakitangan KUIS demi memaksimumkan tanggungjawab sosial mereka terutamanya dalam meringankan kos pengurusan Masjid Al Azhar, KUIS yang semakin meningkat.

Sorotan Kajian

Dalam al-Quran, kalimah infaq disamakan maksudnya dengan nafkah. Antaranya Allah SWT menyebut perkataan infaq dan nafkah sebanyak 49 kali dalam al-Quran. Banyak ayat al-Quran yang menyentuh mengenai budaya infaq ini yang mana ia mempunyai kaitan yang sangat erat dengan takwa. (Antaranya, ayat 215 surah al-Baqarah). Saad bin Abi Waqas r.a. menceritakan bahawa Rasulullah SAW pernah bersabda:

Nafkah (infak) yang kamu berikan semata-mata kerana Allah nescaya diberi pahala oleh Allah; bahkan apa yang kamu berikan untuk makanan isteri kamu (perbelanjaan rumahtangga) juga akan diberi pahala oleh Allah (Hadis Riwayat-Bukhari).

Sabda "Rasulullah SAW "Bukankah Allah telah menjadikan untukmu sesuatu yang dapat disedekahkan? Setiap tasbih adalah sedekah, setiap tahmid adalah sedekah, setiap tahlil adalah sedekah, menyuruh pada kebaikan adalah sedekah, melarang kemungkaran adalah sedekah, dan hubungan jima' kalian (dengan isteri) adalah sedekah (HR. Muslim).

"Senyumanmu untuk saudaramu adalah sedekah" (H.R. Bukhari Kitab Adab). Rasulullah s.a.w pernah menyatakan bahawa perbuatan makruf dapat menghakiskan kejahatan; sedekah atau infaq yang disumbangkan secara sembunyi boleh memadam murka Tuhan; dan menghubungkan silaturrahim boleh memanjangkan umur.

Sedekah adalah perbuatan baik yang memberikan manfaat bagi diri sendiri dan orang lain. Mankala **Infaq** adalah memberikan harta benda (materi) yang bermanfaat kepada orang lain. Jadi, infaq itu termasuk sedekah tapi sedekah itu boleh jadi bukan infaq. Untuk bersedekah tak perlu ada harta tapi untuk melakukan infaq perlu ada harta (Khutbah Jumaat 17 Jun 2011).

Sedekah adalah salah satu instrumen kewangan dan ekonomi Islam yang mempunyai ciri-ciri yang fleksibel dan berbentuk sukarela. Ia boleh dianggap sebagai satu instrumen penyokong dan pelengkap (*supportive and complementary instrument*) bagi instrumen-instrumen yang wajib di dalam Islam seperti zakat, nafkah, kaffarah dan lain-lain. Kesan positif sedekah tidak dapat digambarkan dalam bentuk nombor atau kuantiti kerana ia bukan sahaja meliputi kesan ekonomi dan kewangan, bahkan meliputi kesan kerohanian, sosial, keberkatan dan lain-lain. Ia menitikberatkan kaedah-kaedah *infaq* atau kaedah/seni perbelanjaan Islam. Maka, pelbagai kaedah yang berbentuk wajib digariskan di dalam Shariat Islam seperti nafkah tanggungan, *kaffarah*, *dam*, nazar, dan lain-lain, atau sunat seperti sedekah, hadiah, waqaf, hibah, dan lain-lain. Ia juga meletakkan garis panduan bagi mengelak perbelanjaan atau *infaq* yang haram (Abdullaah Jalil & Muhamad Muda, 2008).

Islam memberi perhatian dan penekanan kepada kebajikan umum merentasi keperluan dan kepentingan individu. Budaya *infaq* berfungsi sebagai penyokong kepada pembentukan komuniti masyarakat yang mendokong kepada nilai kesaksamaan dan adil, seperti yang dituntut oleh agama Islam (Ibn Taymiyah, 1985). Infaq adalah salah satu cara membelanjakan kekayaan (Mustafa Omar, 2011). Mustafa telah menghasilkan model infaq tiga tingkat iaitu Model Infaq berdasarkan Tingkatan Al Kasb Al Shaybani yang mengkaji hubungan antara kekayaan dan perbelanjaan. Dapatan kajian Mustafa menyatakan kekayaan mempunyai hubungan langsung dengan perbelanjaan. Oleh itu setiap orang adalah bertanggungjawab terhadap masyarakat dengan mengagihkan pendapatan / kekayaan kepada yang memerlukan agar keseimbangan pendapatan dan kekayaan dalam masyarakat.

Dalam kerangka agama Islam, orientasi material yang bersifat tunggal tidak dianggap sebagai kemuncak kepada kejayaan seseorang individu. Sebaliknya, apa yang menjadi keutamaan tanggungjawab kepada individu Muslim iaitu dapat memberi manfaat atau sumbangan untuk memperkasakan agama dan pembangunan insan. Secara amnya didapati bahawa elemen infaq seperti yang diutarakan oleh Islam merupakan sebahagian daripada mekanisme terbaik yang boleh menyumbang kepada pembangunan insan yang holistik sifatnya. Amalan infaq yang dihayati tersebut merupakan sebahagian daripada tanggungjawab sosial yang perlu ditunaikan oleh setiap individu Muslim berdasarkan kepada kemampuan, kepakaran, dan ketaqwaan yang dimiliki oleh setiap individu Muslim (Shuhairimi Abdullah, 2013).

Satu prinsip yang perlu dipegang dalam perkara berkaitan amalan-amalan sunat ialah (al-Suyuthi, 1998): Maksudnya: "Perkara tambahan (yang sunat)/sukarela itu lebih luas berbanding perkara yang wajib/fardhu. Al-Sheikh Ali al-Jumu'ah (2000), dan Kahf (2008) menyatakan infaq atau sedekah dalam istilah yang umum mempunyai beberapa makna iaitu pertama, sedekah yang diwajibkan oleh Shara' ke atas harta (Zakat harta atau *al-amwal*); kedua, sedekah yang diwajibkan oleh Shara' ke atas (badan) individu (Zakat fitrah atau *al-*

abdan); ketiga sedekah yang diwajibkan oleh seseorang ke atas diri sendiri (sedekah yang wajib kerana nazar); keempat, sedekah yang diwajibkan kerana hak Allah SWT seperti fidyah dan kaffarah; dan kelima sedekah secara sukarela yang disunatkan oleh Shara'.

Enam perkara asas yang perlu dielakkan oleh seorang Muslim dalam *infaq* adalah (al-Misri, 2000; al-Jurjani, 2007) antaranya; membelanjakan harta dalam perkara yang haram (*Al-Tabdhir*), berlebih-lebihan (melampau) berbelanja dalam perkara yang harus (*Al-Israf*), menyempitkan ruang infaq kurang daripada yang sepatutnya (*Al-Taqtir*), kedekut untuk menginfaq harta miliknya (*Al-Bukhl*), kedekut untuk menginfaq harta miliknya atau milik orang lain ke arah kebajikan dan kebaikan (*Al-Shuhh*) dan tidak melaksanakan kewajipan harta seperti mengeluarkan zakat (*Kanz al-mal*).

Infaq atau sedekah sangat mudah dilakukan. Ianya terbuka sepanjang tahun untuk menerima sumbangan, sumbangan boleh dibuat dalam pelbagai bentuk dan jenis harta, boleh diagihkan secara lebih meluas dalam pelbagai bidang dengan pelbagai tanpa syarat-syarat yang ketat, tidak ada jumlah maksimum atau minimum bagi sumbangan; dan kesinambungannya tidak bergantung kepada mana-mana individu (Abdullaah Jalil & Muhamad Muda, 2008)

Bagaimanapun terdapat beberapa faktor yang mempengaruhi kutipan zakat, infaq dan sedekah. Mujiyati, Bagus & Muhammad (2010), mengkaji bagaimana promosi, bilangan jaringan kerja dan waktu mempengaruhi kutipan ini di *Lazis Al Ihsan-Central of Java*, Indonesia. Didapati ketiga-tiga faktor ini mempunyai hubungan signifikan dengan jumlah kutipan selain faktor-faktor lain yang tidak dikaji.

Secara amnya walaupun infaq / sedekah hukumnya adalah sunat, tidak seperti zakat tetapi ia juga memberi sumbangan yang besar kepada ummah terutamanya dalam memenuhi tanggungjawab sosial yang sangat dituntut oleh Islam. Walaupun ia mudah dilaksanakan dan dijanjikan ganjaran yang besar di sisi Allah tetapi tanpa persediaan akal fikiran dan pemerksaan nilai-nilai takwa dalam diri seseorang Muslim amalan infaq tidak mampu dibudayakan (Shuhairimi Abdullah, 2013).

Hasil daripada analisis Penyata Tabung Infaq KUIS 2013 yang diperolehi daripada Bahagian Pengurusan Insan (Oktober 2014), mendapati purata kakitangan yang menjadi peserta Tabung Infaq ialah hanya 13.81% iaitu purata seramai 84 orang daripada 607 orang kakitangan (Jadual 1 – Analisis Penyata Tabung Infaq, KUIS pada 2013). Peratusan ini dianggap rendah memandangkan KUIS adalah salah satu institusi pengajian tinggi Islam yang kakitangannya dianggap sentiasa subur dengan budaya zakat, wakaf, infaq dan sedekah. Bagaimanapun kajian lanjutan perlu dilakukan untuk mengenal pasti faktor-faktor yang membawa kepada situasi ini.

Jadual 1 – Analisis Penyata Tabung Infaq, KUIS pada 2013


Bil	Bulan	Bil Kakitangan KUIS (Orang)	Bil Peserta Infaq (Orang)	Amaun Tabung Infaq (RM)	Peratus Peserta Infaq (%)	Purata Tabung Infaq seorang (RM)
1	JANUARI	642	85	1,681.00	13.24	19.78
2	FEBRUARI	638	85	1,681.00	13.32	19.78

3	MAC	641	86	1,726.00	13.42	20.07
4	APRIL	636	86	1,436.00	13.52	16.70
5	MEI	629	86	1,481.00	13.67	17.22
6	JUN	632	86	1,481.00	13.61	17.22
7	JULAI	630	85	1,441.00	13.49	16.95
8	OGOS	628	85	1,461.00	13.54	17.19
9	SEPTEMBER	558	82	1,468.00	14.70	17.90
10	OKTOBER	560	82	1,468.00	14.64	17.90
11	NOVEMBER	555	76	1,288.00	13.69	16.95
12	DISEMBER	546	81	1,288.00	14.84	15.90
	JUMLAH			17,900.00		
	PURATA	607	84		13.81	17.80

(Sumber: Bahagian Pengurusan Insan, Oktober 2014)

Manakala bacaan rajah siri masa yang diperolehi menunjukkan purata amaun infaq peserta semakin menurun walaupun berlaku sedikit turun naik bilangan atau amaun infaq peserta secara tidak konsisten (Rajah 1- Siri Masa: Peratus Peserta Infaq dan Purata Amaun Infaq). Purata amaun infaq tertinggi ditunjukkan pada bulan Mac 2013 iaitu sebanyak RM1,726 dengan 86 peserta. Amaun ini menurun dan meningkat secara tidak konsisten sehinggalah pada Disember 2013 hampir berlaku pertemuan antara kedua-duanya iaitu peratusan peserta dan purata amaun infaq. Ia menunjukkan berlaku peningkatan peratusan peserta tetapi penurunan amaun infaq.

Rajah 1 - Siri Masa: Peratus Peserta Infaq dan Purata Amaun Infaq



Sementara itu anjakan gaji kakitangan pada bulan Julai 2013 memberikan sedikit peningkatan kepada bilangan peserta dan amaun tabung infaq bagi bulan Ogos sehingga Oktober 2013. Bagaimanapun, keduanya menurun semula pada bulan November dan kemudiannya hampir berlaku titik pertemuan antara keduanya pada Disember 2013. Ini bertentangan dengan hasil kajian yang diperolehi oleh Mustafa (2011), *Economic Consumption Model Revisited: Infaq Based on Al-Shaybani's Levels of Al-Kasb* yang mendapati apabila kekayaan / pendapatan bertambah perbelanjaan (wajib, sunat, harus) juga bertambah. Pada pendapat penyelidik turun

naik yang tidak konsisten ini adalah disebabkan ada antara peserta yang menarik diri atau menamatkan perkhidmatan dari KUIS dan pertambahan peserta baharu dengan amaun potongan infaq yang pelbagai.

Kesimpulan

Walaupun analisis awal ini menunjukkan bilangan peserta yang terlibat dengan potongan Tabung Infaq KUIS ini rendah dan anjakan gaji tidak memberikan kesan yang signifikan kepada peningkatan bilangan peserta dan amaun tabung infaq, ia bukanlah titik penamat kepada usaha ini. Ini bakal menjadi permulaan kepada sesuatu yang lebih baik di masa akan datang. Kajian lanjutan perlu dilakukan untuk mengenalpasti faktor-faktor penurunan dan peningkatan ini dalam usaha meningkatkan amaun tabung infaq serta lebih agresif dalam mempromosikan Tabung Infaq ini demi mencapai objektif ia diwujudkan. Di harap tanggungjawab sosial yang dilakukan oleh KUIS ini bukan sahaja melalui Tabung Infaq malah Bahagian Pengurusan Yayasan, Wakaf dan Zakat KUIS adalah kesinambungan kepada usaha merealisasikan Rumah Sadaqah (*Bait as sadaqah / House of Sadaqah*) di peringkat negara. Dan KUIS adalah sebagai *Mini House of Sadaqah*. Semoga usaha murni ini diberkati Allah.

Rujukan

Mustafa Omar Mohammed (2011), Economic Consumption Model Revisited: *Infaq* Based on *Al-Shaybani's* Levels of *Al-Kasb*, International Journal of Economics, Management & Accounting, Supplementary Issue 19: 115-132, The International Islamic University Malaysia.

Monzer Kahf (2008), *Infaq in the Islamic Economic System*

Shuhairimi Abdullah (2013), Memperkasakan Pembangunan Insan Melalui Amalan Infaq, SOSIOHUMANIKA: Jurnal Pendidikan Sains Sosial dan Kemanusiaan, 6(2) November 2013.

Abdullaah Jalil & Muhamad Muda (2008), Pengurusan Dana sedekah Secara Sistematik: Analisa Peranan Institusi Kerajaan dan Swasta, Fakulti Ekonomi dan Muamalat, Universiti Sains Islam Malaysia, JAWHAR .

Mujiyati, Bagus Rudhiyoko, Muhammad Sholahuddin (2010), Some Influence Factors of Zakah, Infaq, Shadaqah Collecting (CASE IN SURAKARTACENTRAL JAVA-INDONESIA), Seventh International Conference – The Tawhidi Epistemology: Zakat and Waqf Economy, Bangi.

Khutbah Jumaat 17 Jun 2011: “Amalan Wakaf dan Kepentingannya dalam Kehidupan”
Jabatan Agama Islam Selangor

Abu Bakar Yang (2007), Sedekah bukan mesti dengan harta, Utusan Malaysia, Arkib 09/10/2007.

Infaq, Sedekah dan Zakat (2011), Utusan Malaysia, , Arkib 14/10/2011.

(Hadis Riwayat-Bukhari).

Penyata potongan Tabung Infaq, Bahagian Pengurusan Insan , KUIS (2013).

Penyata Akaun Masjid Al Azhar, KUIS (2013).